

西漢會要



西漢會要卷二十七

宋徐天麟撰

運歷上

五運正朔服色附

自齊威宣時騶子之徒論著終始五德之運

如淳曰今其書有五

德終始五德各以所勝為行秦謂周為火德滅火者水故自謂水德師古曰騶子即騶衍及秦帝而

齊人奏之故始皇采用之郊祀志

秦兼天下頗推五勝而自以為獲水德乃以十月為正色尚黑漢興方綱紀大基庶事草創襲秦正朔以北平

侯張蒼言用顓頊歷然正朔服色未覩其真云云律歷志

高祖立為沛公旗幟皆赤由所殺蛇白帝子所殺者赤

帝子故也本紀

漢承堯運德祚已盛斷蛇著符旗幟上赤協於火德自

然之應得天統矣高帝贊

漢興高祖曰北時待我而起亦自以為獲水德之瑞雖

明習歷及張蒼等咸以為然是時天下初定方綱紀大

基高后女主皆未遑故襲秦正朔服色歷書

文帝時賈誼以為漢興二十餘年宜當改正朔易服色

制度迺草具儀其儀法色上黃數用五帝謙讓未遑也

本傳

文帝十六年魯人公孫臣上書曰始秦得水德及漢受

之推終始傳以漢當土德土德之應黃龍見宜改正朔

服色上黃張蒼以為漢迺水德之時河決金隄其符也

年始冬十月色外黑內赤與德相應公孫臣言非是罷

之明年黃龍見成紀文帝召公孫臣拜為博士與諸生

申明土德草改歷服色事新垣平玉杯詐覺是後文帝

怠於改正服鬼神之事郊祀志

武帝卽位天下艾安縉紳之屬皆望天子封禪改正度也趙綰王臧議草改厯服色事未就竇太后不好儒術

使人按綰臧自殺

郊祀志

元封七年司馬遷等言厯紀壞廢宜改正朔是時御史大夫兒寬明經術上迺詔寬曰今宜何以爲正朔服色何上寬與博士賜等議皆曰帝王必改正朔易服色所以明受命於天也創業變改制不相復推傳序文則今夏時也於是迺詔以七年爲元年

律厯志

太初元年夏五月正厯以正月爲歲首色上黃數用五

張晏曰漢據土德土數五故用五定官名協音律

本紀

班固曰漢興之初庶事草創唯一叔孫生略定朝廷之儀若迺正朔服色郊望之事數世猶未章焉至於孝文始以夏郊而張蒼據水德公孫臣賈誼更以爲土德卒不能明孝武之世文章爲盛太初改制而兒寬司馬遷等猶從臣誼之言服色數度遂順黃德彼以爲五德之傳從所不勝秦在水德故漢據土而克之劉向父子以爲帝出于震故包羲氏始受木德其後以母傳子終而復始自神農黃帝下厯唐虞三代而漢得火焉故高祖

始起神母夜號著赤帝之符旗章遂赤自得天統矣昔
共工氏以水德闕于木火與秦同運非其次序故皆不
永由是言之祖宗之制蓋有自然之應順時宜矣

郊祀志贊

歷

漢興方綱紀大基庶事草創襲秦正朔以北平侯張蒼
言用顓頊歷比於六歷疏闊中最爲微近然正朔服色
未覩其真而朔晦月見弦望滿虧多非是至武帝元封
七年漢興百二歲矣太中大夫公孫卿壺遂太史令司
馬遷等言歷紀壞廢宜改正朔是時御史大夫兒寬明

經術上迺詔寬曰與博士共議今宜何以為正朔服色
何上寬與博士賜等議皆曰帝王必改正朔易服色所
以明受命於天也創業變改制不相復推傳序文則今
夏時也臣等問學褊陋不能明陛下躬聖發憤昭配天
地臣愚以為三統之制後聖復前聖者二代在前也今
二代之統絕而不序矣唯陛下發聖德宣考天地四時
之極則順陰陽以定大明之制爲萬世則於是迺詔御
史曰迺者有司言歷未定廣延宣問以考星度未能讎
也蓋聞古者黃帝合而不死名察發斂定清濁起五部

建氣物分數然則上矣書缺樂弛朕甚難之依違以惟
未能修明其以七年爲元年遂詔卿遂遷與侍郎尊大
典星射姓等議造漢歷迺定東西立晷儀下漏刻以追
二十八宿相距於四方舉終以定朔晦分至躔離弦望
迺以前歷上元泰初四千六百一十七歲至於元封七
年復得闕逢攝提格之歲中冬十一月甲子朔旦冬至
日月在建星太歲在子已得太初本星度新正姓等奏
不能爲算願募治歷者更造密度各自增減以造漢太
初歷迺選治歷鄧平及長樂司馬可酒泉候宜君侍郎

尊及與民間治歷者凡二十餘人方士唐都巴郡落下
閎與焉部分天部而闕運算轉歷其法以律起歷曰律
容一龠積八十一寸則一日之分也與長相終律長九
寸百七十一分而終復三復而得甲子夫律陰陽九六
爻象所從出也故黃鐘紀元氣之謂律律法也草不取
法焉與鄧平所治同於是皆觀新星度日月行更以算
推如闕平法法一月之日二十九日八十一分日之四
十三先藉半日名曰陽歷不藉名曰陰歷所謂陽歷者
先朔月生陰歷者朔而後月迺生平曰陽歷朔皆先旦

月生以朝諸侯王羣臣便迺詔遷用鄒平所造八十一
分律厯罷廢尤疏遠者十七家復使校律厯昏明宦者
淳于陵渠復復太初厯晦朔弦望皆最密日月如合璧
五星如連珠陵渠奏狀遂用鄧平厯以平爲太史丞後
二十七年元鳳三年太史令張壽王上書言厯者天地
之大紀上帝所爲傳黃帝調律厯漢元年以來用之今
陰陽不調乃更厯之過也詔下主厯使者鮮于妄人詰
問壽王不服妄人請與治厯大司農中丞麻光等二十
餘人雜候日月晦朔弦望八節二十四氣鈞校諸厯用

狀奏可詔與丞相御史大將軍右將軍史各一人雜候
上林清臺課諸厯疏密凡十一家以元鳳三年十一月
朔日冬至盡五年十二月各有第壽王課疏遠案漢元
年不用黃帝調厯壽王非漢厯逆天道非所宜言大不
敬有詔勿劾復候盡六年太初厯第一卽墨徐萬日長
安徐禹治太初厯亦第一壽王及待詔李信治黃帝調
厯課皆疏闊又言黃帝至元鳳三年六千餘歲丞相屬
寶長安單安國安陵栢育治終始言黃帝以來三千六
百二十九歲不與壽王合壽王又移帝王錄舜禹年歲

不合人年壽王言化益爲天子代禹驪山女亦爲天子
在殷周間皆不合經術壽王厯迺太史官殷厯也壽王
猥曰安得五家厯又妄言太初厯虧四分日之三去小
餘七百五分以故陰陽不調謂之亂世劾壽王吏八百
石古之大夫服儒衣誦不祥之辭作妖言欲亂制度不
道奏可壽王候課比三年下終不服再劾死更赦勿劾
遂不更言誹謗益甚竟以下吏故厯本之驗在於天自
漢厯初起盡元鳳六年三十六歲而是非堅定至孝成
世劉向總六厯列是非作五紀論向子歆究其微眇作

三統厯及譜以說春秋推法密要故述焉

律厯志

漢興高祖曰北時待我而起亦自以爲獲水德之瑞雖
明習厯及張蒼等咸以爲然是時天下初定方綱紀大
基高后女主皆未遑故襲秦正朔服色至孝文時魯人
公孫臣以終始五德上書言漢得土德宜更元改正朔
易服色當有瑞瑞黃龍見事下丞相張蒼張蒼亦學律
厯以爲非是罷之其後黃龍見成紀張蒼自黜所欲論
著不成而新垣平以望氣見頗言正厯服色事貴幸後
作亂故孝文皇帝廢不復問至今上卽位招致方士唐

都分天部

漢書音義曰謂分二十八宿為躔度

而巴落下閔運算轉歷然

後日辰之度與夏正同乃改元更官號封泰山因詔御

史曰乃者有司言星度之未定也廣延宣問以理星度

未能讐也蓋聞昔者黃帝合而不死名察發歛定清濁

起五部建氣物分數

應劭曰言黃帝造歷得仙名節會察寒暑致啓閉分至定清濁起五

部五部金木水火土也建氣物分數皆叙歷之意也孟

康曰合作也黃帝作歷歷終復始無窮已故曰不死清

濁律聲之清濁也五部五行也天有四時分為五行也

氣二十四氣物萬物也分歷數之分也墳曰黃帝聖德

與虛合契升龍登仙於天故曰合而不死題

名宿度候察進退謂三辰之度吉凶之驗也然蓋尚矣

書缺樂弛朕甚閔焉朕唯未能循明也紬績日分率應

水德之勝

徐廣曰蓋以為應土德土勝水

今日順夏至黃鐘為宮林鐘

為徵太簇為商南呂為羽姑洗為角自是以後氣復正

羽聲復清名復正變以至子日當冬至則陰陽離合之

道行焉十一月甲子朔旦冬至已詹其更以七年為太

徐廣曰歲陰在寅左

月名畢

初元年年名焉逢攝提格

徐廣曰歲陰在寅左

行歲星在丑右行

聚日得甲子夜半朔旦冬至

漢興北平侯張蒼首律歷事孝武帝時樂官考正至元

始中王莽秉政欲耀名譽徵天下通知鐘律者百餘人

使羲和劉歆等典領條奏言之最詳故刪其偽辭取正

義著于篇

律歷志

漢高祖皇帝著紀伐秦繼周木生火故爲火德天下號曰漢距上元年十四萬三千二十五歲歲在大棗之東并二十二度鶉首之六度也故漢志曰歲在大棗名曰敦牂太歲在午八年十一月乙巳朔旦冬至楚元三年也故殷歷以爲丙午距元朔七十六歲著紀高帝卽位十二年

惠帝著紀卽位七年

高后著紀卽位八年

文帝前十六年後七年著紀卽位二十三年

景帝前七年中六年後三年著紀卽位十六年

武帝建元元光元朔各六年元朔六年十一月甲申朔旦冬至殷歷以爲乙酉距初元七十六歲元狩元鼎元封各六年漢歷太初元年距上元十四萬三千一百二十七歲前十一月甲子朔旦冬至歲在星紀婺女六度故漢志曰歲名困敦正月歲星出婺女太初天漢太始征和各四年後二年著紀卽位五十四年

昭帝始元元鳳各六年元平一年著紀卽位十三年

宣帝本始地節元康神爵五鳳甘露各四年黃龍一年
著紀卽位二十五年

元帝元初二年十一月癸亥朔旦冬至殷歷以爲甲子
以爲紀首是歲也十月日食非合辰之會不得爲紀首
距建武七十六歲初元永光建昭各五年竟寧一年著
紀卽位十六年

成帝建始河平陽朔鴻嘉永始元延各四年綏和二年
著紀卽位二十六年

哀帝建平四年元壽二年著紀卽位六年

平帝著紀卽位元始五年以宣帝元孫嬰爲嗣謂之孺
子孺子著紀新都侯王莽居攝三年王莽居攝盜襲帝
位竊號曰新室始建國五年天鳳六年地皇三年著紀
盜位十四年更始帝著紀以漢宗室滅王莽卽位二年
赤眉賊立宗室劉盆子滅更始帝自漢元年訖更始二
年凡二百三十歲

並律
歷志

改元

文帝十六年新垣平言上曰闕下有寶玉氣來者已視
之果有獻玉杯者刻曰人主延壽平又言臣候日再中

居頃之日卻復中於是始更以十七年為元年郊祀志

武帝建元元年本紀師古曰自古帝王未有年號始起於此劉攽曰封禪書云其後二年有司

言元宜以天瑞命不宜以一二數推所謂其後三年者蓋盡元狩六年至元鼎三年也然元鼎四年方得寶鼎

又無緣先三年而稱之以此而言自元鼎以前之元皆有司所追命其實年號之起在元鼎耳故元封改元則

始有詔書矣

有司言元宜以天瑞不宜以一二數一元曰建二元以

長星曰光今剋得一角獸曰狩云郊祀志

元封元年詔曰朕以眇身承至尊兢兢焉唯德菲薄不

明于禮樂故用事八神遭天地況施著見景象屑然如

有聞震于怪物欲止不敢遂登封泰山至于梁父然後

升禮肅然自新嘉與士大夫更始其以十月為元封元

年武紀

元封七年漢興百二歲矣太中大夫公孫卿壺遂太史

令司馬遷等言歷紀壞廢宜改正朔是時御史大夫兒

寬明經術上迺詔寬曰與博士共議今宜何以為正朔

服色何上寬與博士賜等議皆曰帝王必改正朔易服

色所以明受命於天也創業變改制不相復推傳序文

則今夏時也臣等問學褊陋不能明陛下躬聖發憤昭

配天地臣愚以為三統之制後聖復前聖者二代在前也今二代之統絕而不序矣唯陛下發聖德宣考天地四時之極則順陰陽以定大明之制為萬世則於是迺詔御史曰迺者有司言歷未定廣延宣問以考星度未能讎也蓋聞古者黃帝合而不死名察發斂定清濁起五部建氣物分數然則上矣書缺樂弛朕甚難之依違以惟未能修明其以七年為元年

律歷志

宣帝神爵元年詔曰朕承宗廟戰戰栗栗惟萬事統未燭厥理迺元康四年嘉穀元稷降于郡國神爵仍集金

芝九莖產于涵德殿銅池中九真獻奇獸南郡獲白虎威鳳為寶朕之不明震于珍物飭躬齊精祈為百姓東濟大河天氣清靜神魚舞河幸萬歲宮神爵翔集朕之不德懼不能任其以五年為神爵元年

元帝竟寧元年春正月匈奴虜韓邪單于來朝詔曰匈奴邛支單于背叛禮義既伏其辜虜韓邪單于不忘恩德鄉慕禮義復修朝賀之禮願保塞傳之無窮邊垂長無兵革之事其改元為竟寧

成帝河平元年春三月詔曰河決東郡流漂二州校尉

王延世隄塞輒平其改元爲河平

河平四年火生石中改元爲陽朔

哀帝建平二年待詔夏賀良等言赤精子之讖漢家歷
運中衰當再受命宜改元易號詔曰漢興二百載歷數
開元皇天降非材之佑漢國再獲受命之符朕之不德
曷敢不通夫基事之元命必與天下自新其大赦天下
以建平二年爲太初元年號曰陳聖劉太平皇帝漏刻
以百二十爲度八月詔曰待詔夏賀良等建言改元易
號增益漏刻可以永安國家朕過聽賀良等言冀爲海

內獲福卒亡嘉應皆違經背古不合時宜六月甲子制
書非赦令也皆蠲除之賀良等反道惑衆下有司皆伏

辜

以上並
本紀

西漢會要卷二十八

宋徐天麟撰

運歷下

天文

漢元年十月五星聚東井

三年秋太白出西方有光幾中乍北乍南過期迺入辰

星出四孟

七年月暈圍參畢七重

十二年春熒惑守心

孝惠二年天開東北廣十餘丈長二十餘丈

孝文後二年正月壬寅天欒夕出西南其四月乙巳水
木火三合於東井八月天狗下梁壅其十一月戊戌土
水合於危其七月火東行行畢陽環畢東北出而西逆
行至昴卽南迺東行

孝景元年正月癸酉金水合於婺女其七月乙丑金木
水三合於張其二年七月丙子火與水晨出東方因守
斗其十二月水火合於斗是歲彗星出西南七月天狗
下

三年填星在婁幾入還居奎

四年七月癸未火入東井行陰又以九月己未入輿鬼
戊寅出

中元年填星當在觜觶參去居東井其三年正月丁亥
金木合爲觜觶其三月丁酉彗星夜見西北色白長丈
在觜觶旦去益小十五日不見其五月甲午金木俱在
東井戊戌金去木留守之二十日其六月壬戌蓬星見
西南在房南去房可二丈大如二斗器色白癸亥在心
東北可長丈所甲子在尾北可六丈丁卯在箕北近漢

稍小旦去時大如桃壬申去凡十日

中三年十一月庚午夕金火合於虛相去一寸

四年四月丙申金木合於東井其五年四月乙巳水火合於參

後元年五月壬午火金合於輿鬼之東北不至柳出輿鬼北可五寸

孝武建元三年三月有星孛於注張歷太微干紫宮至於天漢

三年四月有星孛於天紀至織女

六年熒惑守輿鬼

元光元年六月客星見于房

元光中天星盡摺

元鼎五年太白入于天苑

元鼎中熒惑守南斗

元封中星孛于河戍

太初中星孛于招搖

孝昭始元中蓬星出西方天市東門行過河鼓入營室中後太白出西方下行一舍復上行二舍而下去後太

白出東方入咸池東下入東井後太白入太微西藩第一星北出東藩第一星北東下去後太白入昴後熒惑出東方守太白後流星下燕萬載宮極東去

元鳳四年九月客星在紫宮中斗樞極間五年四月燭星見奎婁間

元平元年正月庚子日出時有黑雲狀如炎風亂鬢轉出西北東南行轉而西有頃亡

二月甲申晨有大星如月有衆星隨而西行乙酉辟雲如狗赤色長尾三枚夾漢西行

三月丙戌流星出翼軫東北于太微入紫宮始出小旦入大有光入有頃聲如雷三鳴止

孝宣本始元年四月壬戌甲夜辰星與參出西方其二
年七月辛亥夕辰星與翼出皆爲蚤其後熒惑守房之
鈞鈐四年七月甲辰辰星在翼月犯之是日熒惑入輿
鬼天質

地節元年正月戊午乙夜月食熒惑熒惑在角亢其辛
酉熒惑入氏中其六月戊戌甲夜客星又居左右角間
東南指長可二尺色白其丙寅又有客星見貫索東北

南行至七月癸酉夜入天市芒炎東南指其色白

黃龍元年三月客星居王梁東北可九尺長丈餘西指
山閣道間至紫宮

元帝初元元年四月客星大如瓜色青白在南斗第二
星東可四尺

二年五月客星見昴分居卷舌東可五尺青白色炎長
三寸

五年四月彗星出西北赤黃色長八尺所後數日長丈
餘東北指在參分

孝成建始元年九月戊子有流星出文昌色白光燭地
長可四丈大一圍動搖如龍虵行有頃長可五六丈大
四圍所訕折委曲貫紫宮西在斗西北子亥閒後訕如
環北方不合留一刻所

四年七月熒惑踰歲星居其東北半寸所如連李時歲
星在關星西四尺所熒惑初從畢口大星東東北住數
日至往疾去遲

四年十一月乙卯月食填星星不見時在輿鬼西北八
九尺所

河平二年十月下旬填星在東井軒轅南端大星尺餘
歲星在其西北人所熒惑在其西北二尺所皆從西方
來填星貫輿鬼先到歲星次熒惑亦貫輿鬼十一月上
旬歲星熒惑西去填星皆西北逆行

陽朔元年七月壬子月犯心星

四年閏月庚午飛星大如缶出西南入斗下

永始二年二月癸未夜東方有赤色大三四圍長二三
丈索索如樹南方有大四五圍下行十餘丈皆不至地
滅

元延元年四月丁酉日銷時天暝晏殷殷如雷聲有流
星頭大如缶長十餘丈皎然赤白色從日下東南去四
面或大如盂或如雞子耀耀如雨下至昏止

綏和元年正月辛未有流星從東南入北斗長數十丈
一刻所息

二年春熒惑守心

哀帝建平元年正月丁未日出時有著天白氣廣如一
匹布長十餘丈西南行謹如雷一刻而止名曰天狗十
二月白氣出西南從地上至天出參下貫天厠廣如一

匹布長十餘丈十餘日去

二年二月彗星出牽牛七十餘日

元壽元年十一月歲星入太微逆行干右執法並天文志

權量

張蒼定章程高紀如淳曰章歷數之章術也程者權衡丈尺斗斛之平法也

一曰備數二曰和聲三曰審度四曰嘉量五曰權衡數者一十百千萬也所以算數事物順性命之理也夫推慝生律制器規園矩方權重衡平準繩嘉量探蹟索隱鈎深致遠莫不用焉度長短者不失毫釐量多少者不

失圭撮權輕重者不失黍絜其法在算術職在太史義和掌之

聲者宮商角徵羽也職在太樂太常掌之

度者分寸尺丈引也所以度長短也本起黃鐘之長以子穀秬黍中者一黍之廣度之九十分黃鐘之長一為一分十分為寸十寸為尺十尺為丈十丈為引而五度

審矣其法用銅高一寸廣二寸長一丈而分寸尺丈存焉用竹為引高一尺廣六分長十丈其方法矩高廣之數陰陽之象也分者自三微而成者可分別也寸者忖

也尺者隻也丈者張也引者信也夫度者別於分寸於寸隻於尺張於丈信於引引者信天下也職在內官廷尉掌之

量者龠合升斗斛也所以量多少也本起於黃鐘之龠用度數審於容以子穀秬黍中者千有二百實其龠以井水準其槩合龠爲合十合爲升十升爲斗十斗爲斛而五量嘉矣其法用銅方尺而圍其外旁有庀焉其上爲斛其下爲斗左耳爲升右耳爲合龠其狀似爵以縻爵祿上三下二參天兩地圓而函方左一右二陰陽之

象也其圓象規其重二鈞備氣物之數合萬有一千五百二十聲中黃鐘始於黃鐘而反覆焉君制器之象也龠者黃鐘律之實也躍微動氣而生物也合者合龠之量也升者登合之量也斗者聚升之量也斛者角斗平多少之量也夫量者躍於龠合於合登於升聚於斗角於斛職在太倉大司農掌之

衡權者衡平也權重也衡所以任權而均物平輕重也其道如底以見準之正繩之直左旋見規右折見矩其在天也佐助旋璣斟酌建指以齊七政故曰玉衡論語

云立則見其參於前也在車則見其倚於衡也又曰齊之以禮此衡在前居南方之義也權者銖兩斤鈞石也所以稱物平施知輕重也本起於黃鐘之重一龠容千二百黍重十二銖兩之爲兩二十四銖爲兩十六兩爲斤三十斤爲鈞四鈞爲石忖爲十八易十有八變之象也五權之制以義立之以物鈞之其餘小大之差以輕重爲宜圓而環之令之內倍好者周旋無端終而復始無窮已也銖者物繇忽微始至於成著可殊異也兩者兩黃鐘律之重也二十四銖而成兩者二十四氣之象

也斤者明也三百八十四銖易一篇之爻陰陽變動之象也十六兩成斤者四時乘四方之象也鈞者均也陽施其氣陰化其物皆得其成就平均也權與物均重萬一千五百二十銖當萬物之象也四百八十兩者六旬行八節之象也三十斤成鈞者一月之象也石者大也權之大者也始於銖兩於兩明於斤均於鈞終於石物終石大也四鈞爲石者四時之象也重百二十斤者十二月之象也終於十二辰而復于子黃鐘之象也千九百二十兩者陰陽之數也三百八十四爻五行之象也

四萬六千八十銖者萬一千五百二十物歷四時之象也而歲功成就五權謹矣權與物鈞而生衡衡運生規規圓生矩矩方生繩繩直生準準正則平衡而鈞權矣是爲五則規者所以規圓器械令得其類也矩者所以矩方器械令不失其形也規矩相須陰陽位序圓方乃成準者所以揆平取正也繩者上下端直經緯四通也準繩連體衡權合德百工繇焉以定法式

凡律度量衡用銅者名自名也所以同天下齊風俗也銅爲物之至精不爲燥濕寒暑變其節不爲風雨暴露

改其形介然有常有似於士君子之行是以用銅也用竹爲引者事之宜也

並律
歷志

時令

文帝元年詔曰方春和時草木羣生之物皆有以自樂而吾百姓鰥寡孤獨窮困之人或沾於死亡而莫之省憂爲民父母將如何其議所以振貸之

本紀

宣帝時魏相表采易陰陽及月令明堂奏之臣聞易曰天地以順動故日月不過四時不忒聖王以順動故刑罰清而民服天地變化必繇陰陽陰陽之分以日爲紀

日冬至則八風之序立萬物之性成各有常職不得相干東方之神太昊乘震執規司春南方之神炎帝乘離執衡司夏西方之神少昊乘兌執矩司秋北方之神顓頊乘坎執權司冬中央之神黃帝乘坤民執繩司土茲五帝所司各有時也東方之卦不可以治西方南方之卦不可以治北方春興兌治則饑秋興震治則華冬興離治則泄夏興坎治則寇明王謹于尊天慎于養人故立義和之官以乘四時節授民事君動靜以道奉順陰陽則日月光明風雨時節寒暑調和三者得叙則災

害不生五穀熟絲麻遂出木茂鳥獸蕃民不夭疾衣食有餘若是則君尊民說上下亡怨政教不違禮讓可興夫風雨不時則傷農桑農桑傷則民飢寒飢寒在身則亡廉恥寇賊姦宄所繇生也臣愚以爲陰陽者王事之本羣生之命自古賢聖未有不繇者也天子之義必純取法天地而觀于先聖高帝所述書天子所服第八曰大謁者臣章受詔長樂宮曰令羣臣議天子所服以安治天下相國臣何御史大夫臣昌謹與將軍臣陵太子太傅臣通等議春夏秋冬天子所服當法天地之數中

得人和故自天子王侯有土之君下及兆民能法天地
順四時以治國家身亡既殃年壽永究是奉宗廟安天
下之大禮也臣請法之中謁者趙堯舉春李舜舉夏兒
湯舉秋貢禹舉冬四人各職一時大謁者襄章奏制曰
可孝文皇帝時以二月施恩惠于天下賜孝弟力田及
罷軍卒祠死事者頗非時節御史大夫鼂錯時為太子
家令言其狀臣相伏念陛下恩澤甚厚然而災氣未息
竊恐詔令有未合當時者也願陛下選明經通知陰陽
者四人各主一時時至明言所職以和陰陽天下幸甚

魏相傳

元康三年六月詔三輔毋得以春夏摘巢探卵彈射飛

鳥具為令

本紀

立春行冤獄使者出

張敞傳

元帝初元三年詔百官勉之毋犯四時之禁

本紀

永光三年十一月詔曰迺者已丑地動中冬雨水大霧

盜賊並起吏何不以時禁各悉意對

本紀師古日時禁謂月令所當禁斷

者也

甘延壽陳湯上疏斬郅支首及名王以下宜縣頭橐街

事下有司丞相匡衡御史大夫繁延壽以為月令春掩
骼埋胔之時宜勿縣車騎將軍許嘉右將軍王商以為
夾谷之會優施笑君孔子誅之方盛夏首足異門而出
宜縣十日乃埋之有詔將軍議是陳湯傳
建昭五年詔曰方春農桑興百姓勸力自盡之時也故
是月勞農勸民無使後時今不良之吏覆案小罪徵召
證案興不急之事以妨百姓使失一時之作亡終歲之
功公卿其明察申救之本紀
成帝陽朔二年春寒詔曰昔在帝堯立義和之官命以

四時之事令不失其序故書云黎民於蕃時雍明以陰
陽為本也今公卿大夫或不信陰陽薄而小之所奏請
多違時政傳以不知周行天下而欲望陰陽和調豈不
謬哉其務順四時月令本紀

鴻嘉元年二月詔曰方春生長時臨遣諫大夫理等舉

三輔三河宏農寃獄本紀

哀帝即位李尋對曰辰星主四時四時失序則辰星作
異今出于歲首之孟天所以譴告陛下也加以號令不
順四時間者春二月治大獄時賊陰立逆恐歲小收季

夏舉兵法時寒氣應恐後有霜雹之災秋月行封爵其
月土濕輿恐後有雷雹之變古之王者尊天地重陰陽
敬四時嚴月令今朝廷忽于時月之令諸侍中尚書近
臣宜皆令通知月令之意設羣下請事若陛下出令有
謬于時者當知爭之以順時本傳

梁王立殺人遣廷尉大鴻臚雜問對曰冬月迫促貪生
畏死即詐僵仆陽病徼幸得踰于須臾師古曰冀得踰冬月而減罪也
謹以實對時冬月盡其春大赦不治本傳
孫寶以春月作詆欺免為庶人本傳

王溫舒為河內太守捕郡中豪猾大者至族小者乃死
會春溫舒頓足嘆曰令冬月益展一月足吾事矣本傳師古

曰立春之後不復行刑故云然

張敞收繫姦繫獄是時冬月未盡數日晝夜驗治竟致
其死敞使告姦曰五日京兆竟何如冬月已盡延命乎

張敞傳

劉向坐鑄偽黃金得踰冬減死論本傳服虔曰踰冬至春行寬大而減死罪

諸葛豐以春夏繫治人在位多言其短上乃制詔御史
豐前為司隸不順四時專作苛暴其免為庶人本傳

孫寶以立秋日署侯文東部督郵入見勅曰今日鷹隼

始擊當順天氣取姦惡以成嚴霜之誅本傳

冬月始請讞于定國傳

冬月傳屬縣囚會論府上嚴延年傳

平當為丞相以冬月賜爵關內侯本傳李奇曰以冬月非封侯時故且先賜

爵關內侯

孔光等請謁者召王嘉詣廷尉詔獄永信少府猛等十

人以為今春月寒氣錯繆霜露數降宜示天下以寬和

王嘉傳

西漢會要卷二十九

宋 徐 天 麟 撰

祥異

符瑞

高祖被酒夜徑澤中令一人行前行前者還報曰前有

大蛇當徑願還高祖醉曰壯士行何畏乃前拔劍斬蛇

蛇分為兩道開行數里醉因卧後人來至蛇所有一老

嫗夜哭人問嫗何哭嫗曰人殺吾子人曰嫗子何為見

殺嫗曰吾子白帝子也化為蛇當道今者赤帝子斬之

故哭人乃以嫗為不誠欲苦之嫗因忽不見本紀

秦始皇帝嘗曰東南有天子氣於是東游以馱當之高

祖隱於芒碭山澤間呂后與人俱求常得之高祖怪問

之呂后曰季所居上常有雲氣故從往常得季本紀

漢元年冬十月五星聚于東井本紀應劭曰東井秦之分野五星所在其下當

有聖人以義取天下

文帝十五年黃龍見於成紀本紀

武帝元狩元年行幸雍祠五時獲白麟作白麟之歌三

年夏馬生余吾水中南越獻馴象能言鳥

元鼎元年得鼎汾水上

四年得寶鼎后土祠旁秋馬生渥洼水中作寶鼎天馬

之歌

元封二年甘泉宮內中產芝九莖連葉作芝房之歌

太始二年詔曰往者朕郊見上帝西登隴首獲白麟以

饋宗廟渥洼水出天馬泰山見黃金宜改故名今更黃

金為麟趾裏蹠以協瑞焉因以頒賜諸侯王

三年行幸東海獲赤雁作朱雁之歌

昭帝始元元年二月黃鵠下建章宮太液池中公卿上

壽

三年鳳凰集東海遣使者祠其處

宣帝本始元年鳳凰集膠東千乘

四年鳳凰集北海安邱淳于

地節二年四月鳳凰集魯郡羣鳥從之

元康元年詔曰乃者鳳凰集泰山陳留甘露降未央宮

朕未能章先帝休烈協寧百姓承天順地調序四時獲

蒙嘉瑞賜茲祉福夙夜兢兢靡有驕色內省匪解永惟

罔極書不云乎鳳凰來儀庶尹允諧其赦天下徒賜勤

事吏中二千石以下至六百石爵自中郎吏至五大夫

佐史以上二級民一級女子百戶牛酒加賜鰥寡孤獨

三老孝弟力田帛所振貸勿收

三年春以神爵數集泰山賜諸侯王丞相將軍列侯二

千石金郎從官帛各有差賜天下吏爵二級民一級女

子百戶牛酒鰥寡孤獨高年帛

六月詔曰前年夏神爵集雍今春五色鳥以萬數飛過

屬縣翱翔而舞欲集未下其令三輔毋得以春夏摘巢

探卵彈射飛鳥具爲令

四年三月詔曰乃者神爵五采以萬數集長樂未央北宮高寢甘泉泰畤殿中及上林苑朕之不逮寡於德厚屢獲嘉祥非朕之任其賜天下吏爵二級民一級女子百戶牛酒加賜三老孝弟力田帛人二匹鰥寡孤獨各一匹

神爵元年詔曰朕承宗廟戰戰栗栗惟萬事統未爛厥理乃元康四年嘉穀元稷降於郡國神爵仍集金芝九莖產於涵德殿銅池中九真獻奇獸南郡獲白虎威鳳爲寶朕之不明震於珍物飭躬齋精祈爲百姓東濟大

河天氣清靜神魚舞河幸萬歲宮神爵翔集朕之不德懼不能任其以五年爲神爵元年賜天下勤事吏爵二級民一級女子百戶牛酒鰥寡孤獨高年帛所振貸物勿收行所過毋出田租

二年二月詔曰迺者正月乙丑鳳凰甘露降集京師羣鳥從以萬數朕之不德屢獲天福祇事不怠其赦天下四年二月詔曰乃者鳳凰甘露降集京師嘉瑞並見修興太一五帝后土之祠祈爲百姓蒙祉福鸞鳳萬舉蜚覽翺翔集止於旁齋戒之暮神光顯著薦鬯之夕神光

西漢會要 卷五
交錯或降於天或登於地或從四方來集於壇上帝嘉
嚮海內承福其赦天下賜民爵一級女子百戶牛酒鰥
寡孤獨高年帛

冬十月鳳凰十一集杜陵十二月鳳凰集上林

五鳳三年詔曰朕飭躬齋戒郊上帝祠戶土神光並見
或興於谷燭耀齋宮十有餘刻甘露降神爵集已詔有
司告祠上帝宗廟三月辛丑鸞鳳又集長樂宮東闕中
樹上飛下止地文章五色留十餘刻吏民並觀朕之不
敏懼不能任屢蒙嘉瑞獲茲祉福書不云乎雖休勿休

祇事不怠公卿大夫其勛焉減天下口錢赦殊死以下
賜民爵一級女子百戶牛酒大酺五日加賜鰥寡孤獨
高年帛

甘露元年黃龍見新豐

二年詔曰乃者鳳凰甘露降集黃龍登輿醴泉滂流枯
槁榮茂神光並見咸受禎祥其赦天下減民算三十賜
諸侯王丞相將軍列侯中二千石金錢各有差賜民爵
一級女子百戶牛酒鰥寡孤獨高年帛

三年詔曰乃者鳳凰集新蔡羣鳥四面行列皆鄉鳳凰

立以萬數其賜汝南太守帛百匹新蔡長吏三老孝弟
力田鰥寡孤獨各有差賜民爵二級毋出今年租

成帝鴻嘉元年冬黃龍見真定

元延四年甘露降京師賜長安民牛酒

平帝元始元年越裳氏重譯獻白雉一黑雉二

二年春黃支國獻犀牛

並本紀

日食

高帝三年十月甲戌晦日有食之在斗二十度

十一月癸卯晦日有食之在虛三度

九年六月乙未晦日有食之既在張十三度

惠帝七年正月辛丑朔日有食之在危十三度

五月丁卯先晦一日日有食之幾盡在七星

高后二年六月丙戌晦日有食之

七年正月己丑晦日有食之既在營室九度

文帝二年十一月癸卯晦日有食之在婺女一度

三年十月丁酉晦日有食之在斗二十三度

十一月丁卯晦日有食之在虛八度

後四年四月丙辰晦日有食之在東井十二度

七年正月辛未朔日有食之

景帝三年二月壬午晦日有食之在胃二度

七年十一月庚寅晦日有食之在虛九度

中元年十二月甲寅晦日有食之

二年九月甲戌晦日有食之

三年九月戊戌晦日有食之幾盡在尾九度

六年七月辛亥晦日有食之在軫七度

後元年七月乙巳先晦一日日有食之在翼十七度

武帝建元二年二月丙戌朔日有食之在奎十四度

三年九月丙子晦日有食之在尾二度

五年正月己巳朔日有食之

元光元年二月丙辰晦日有食之

七月癸未先晦一日日有食之在翼八度

元朔二年二月乙巳晦日有食之在胃三度

六年十一月癸丑晦日有食之

元狩元年五月乙巳晦日有食之在柳六度

元鼎五年四月丁丑晦日有食之在東井二十三度

元封四年六月己酉朔日有食之

太始元年正月乙巳晦日有食之

四年十月甲寅晦日有食之在斗十九度

征和四年八月辛酉晦日有食之不盡如鉤在亢二度

昭帝始元三年十一月壬辰朔日有食之在斗九度

元鳳元年七月己亥晦日有食之幾盡在張十二度

宣帝地節元年十二月癸亥晦日有食之在營室十五

度

五鳳元年十二月乙酉朔日有食之在婺女十度

四年四月辛丑朔日有食之在畢十九度

元帝永光二年三月壬戌朔日有食之在婁八度

四年六月戊寅晦日有食之在張七度

建昭五年六月壬申晦日有食之不盡如鉤因入

成帝建始三年十二月戊申朔日有食之在婺女九度

河平元年四月己亥晦日有食之不盡如鉤在東井六

度

三年八月乙卯晦日有食之在房

四年三月癸丑朔日有食之在昴

陽朔元年二月丁未晦日有食之在胃

永始元年九月丁巳晦日有食之

二年二月乙酉晦日有食之

三年正月己卯晦日有食之

四年七月辛未晦日有食之

元延元年正月己亥朔日有食之

哀帝元壽元年正月辛丑朔日有食之不盡如鉤在營室十度

二年三月壬辰晦日有食之

平帝元始元年五月丁巳朔日有食之在東井

二年九月戊申晦日有食之既

凡漢著紀十二世二百一十二年日食五十三朔十

四晦三十六先晦一日三並五行志

日月變異

武帝建元二年四月戊申有如日夜出本紀

元帝永光元年四月日色青白亡景正中時有景亡光

是夏寒至九月日乃有光

成帝建始元年八月戊午晨漏未盡三刻有兩月重見

河平元年正月壬寅朔日月俱在營室時日出赤二月

癸未日朝赤且入又赤夜月赤甲申日出赤如血亡光

漏上四刻半乃頗有光燭地赤黃食後乃復三月乙未

日出黃有黑氣大如錢居日中央

並五行志

星孛

天文志所載已見天文類五行志所載別見於此

高帝三年七月有星孛于大角旬餘乃入

文帝後七年九月有星孛于西方其本直尾箕末指虛

危長丈餘及天漢十六日不見

武帝建元六年六月有星孛于北方

八月長星出于東方長終天三十日去是爲蚩尤旗見

則王者征伐四方

元狩四年四月長星又出西北

元封元年五月有星孛于東井又孛于三台

宣帝地節元年正月有星孛于西方去太白二丈所

成帝建始元年正月有星孛于營室青白色長六七丈

廣尺餘

元延元年七月辛未有星孛于東井踐五諸侯出河戌

北率行軒轅太微後日六度有餘晨出東方十三日夕

見西方犯次妃長秋斗填蝨炎再貫紫宮中大火當後

達天河除于妃后之域南逝度犯大角攝提至天市而
按節徐行炎入市申旬而後西去五十六日與蒼龍俱

伏並五行志

星隕

成帝永始二年二月癸未夜過中星隕如雨長一二丈

繹繹未至地滅至雞鳴止

五行志

亡冰

武帝元狩六年冬亡冰

昭帝始元二年冬亡冰

並五行志
紀作六年

雪

文帝四年六月大雨雪

景帝中六年三月雨雪

武帝元狩元年十二月大雨雪民多凍死

元鼎二年三月雪平地厚五尺

三年三月水冰四月雨雪

元帝建昭二年十一月齊楚地大雪深五尺

四年三月雨雪燕多死

並五行志

成帝建始四年夏四月雨雪

本紀

西漢會要 卷五
陽朔四年四月雨雪燕雀死五行志

霜雹

武帝元光四年四月隕霜殺草木

元封三年十二月雷雨雹大如馬頭

宣帝地節四年五月山陽濟陰雨雹如雞子深二尺五

寸殺二十人蜚鳥皆死

元帝永光元年三月隕霜殺桑九月二日隕霜殺稼

成帝河平二年四月楚國雨雹大如斧蜚鳥死並五行志

總天變

惠帝二年天雨血於宜陽一頃所五行志赤青

武帝建元四年有風赤如血本紀

元光五年七月大風拔木本紀

天漢元年三月天雨白毛三月八月天雨白鼈毛之彊屈曲者

成帝建始元年四月辛丑夜西北有如火光壬寅晨大

風從西北起雲氣赤黃四塞天下終日夜下著地者黃

土塵也本五行志

十二月大風拔甘泉時中大木十韋以上成紀韋與圍同

哀帝建平四年山陽湖陵雨血廣二尺長五尺大者如

錢小者如麻子五行志

平帝元始四年冬大風吹長安城門東屋瓦且盡紀本

西漢會要卷三十

宋徐天麟撰

祥異下

地震

惠帝二年正月地震隴西厭四百餘家厭一甲反下同

高后二年正月武都山崩地震至八月迺止

武帝征和二年八月癸亥地震厭殺人

宣帝本始四年四月壬寅地震河南以東四十九郡北

海琅邪壞祠宗廟城郭殺六千餘人

元帝永光三年冬地震並五行志

成帝建始三年十二月戊申其夜未央殿中地震紀本

河平三年二月犍爲地震積二十一日百二十四動

綏和二年九月丙辰地震自京師至北邊郡國三十餘

壞城郭凡殺四百一十五人並五行志

山崩

高后二年正月武都山崩殺七百六十人

文帝元年四月齊地山二十九所同日俱大發水潰

出並五行志

成帝建始三年越嶲山崩紀本

河平三年二月丙戌犍爲柏江山崩捐江山崩皆靡江

水江水逆流壞城殺十三人

元延三年正月丙寅蜀郡岷山崩靡江江水逆流三日

迺通並五行志

石鳴

成帝鴻嘉三年乙亥大水冀南山石鳴聲隆隆如雷有

頃止聞平襄二百四十里埜雞皆鳴石長丈三尺廣厚

略等旁著岸脅去地二百餘丈民俗名曰石鼓石鼓鳴

有兵 五行志

石立

孝昭元鳳三年正月泰山萊蕪山南匈匈有數千人聲民視之有大石自立高丈五尺大四十八圍入地深八尺三石為足石立處有白鳥數千集其旁 五行志

隕石

惠帝三年隕石綿諸壹

武帝征和四年二月丁酉隕石雍二天晏亡雲聲聞四百里

元帝建昭元年正月戊辰隕石梁國六

成帝建始四年正月癸卯隕石橐四肥累一

陽朔三年二月壬戌隕石白馬八

鴻嘉二年五月癸未隕石杜衍三

元延四年三月隕石都關二

哀帝建平元年正月丁未隕石北地十其九月甲辰隕石虞二

平帝元始二年六月隕石鉅鹿二

自惠盡平隕石凡十一皆有光耀雷聲成哀尤屢 並五行志

西漢會要 卷三
火災 附 鐵飛

高后元年五月丙申趙叢臺災

惠帝四年十月乙亥未央宮凌室災丙子織室災

文帝七年六月癸酉未央宮東闕眾恩災

景帝中五年八月巳酉未央宮東闕災

武帝建元六年六月丁酉遼東高廟災四月壬子高園
便殿火

太初元年十一月乙酉未央宮柏梁臺災

昭帝元鳳元年燕城南門災

四年五月丁丑孝文廟正殿災

宣帝甘露元年四月丙申中山太上皇廟災甲辰孝文
廟災

元帝初元三年四月乙未孝武園白鶴館災

永光四年六月甲戌孝宣杜陵園東闕南方災

成帝建始元年正月乙丑皇考廟災

鴻嘉三年八月乙卯孝景廟北闕災

永始元年正月癸丑大官凌室災戊午戾后園南闕災
四年四月癸未長樂宮臨華殿及未央宮東司馬門災

六月甲午孝文霸陵園東闕南方災

哀帝建平三年正月癸卯桂宮鴻寧殿災

平帝元始五年七月己亥高皇帝原廟殿門災盡

武帝征和二年春涿郡鐵官鑄鐵鐵銷皆飛上去

成帝河平二年正月沛郡鐵官鑄鐵鐵不下隆隆如雷
聲又如鼓音工十三人驚走音止還視地地陷數尺鑪
分爲十一鑪中銷鐵散如流星皆上去

並五行志

旱

惠帝五年夏大旱江河水少谿谷絕

文帝三年秋天天下旱

後六年春天天下大旱

景帝中三年秋天大旱

武帝元光六年夏大旱

元朔五年春大旱

元狩三年夏大旱

天漢元年夏大旱

三年夏大旱

征和元年夏大旱

昭帝始元六年大旱

宣帝本始三年夏大旱東西數千里

神爵元年秋大旱

成帝永始三年四年夏大旱並五行志

蝗螟

景帝中三年秋蝗

武帝元光五年秋螟

六年夏蝗

元鼎五年秋蝗

元封六年秋蝗

太初元年夏蝗從東方飛至敦煌

三年秋復蝗

征和三年秋蝗

四年夏蝗

平帝元始二年秋蝗徧天下並五行志

人妖

哀帝建平中豫章有男子化為女子嫁為人婦生一子

建平四年四月山陽方與女子田無嗇生子先未生二

西漢會要 卷三
月兒唬腹中及生不舉葬之陌上三日人過聞唬聲母
掘收養

平帝元始元年二月朔方廣牧女子趙春病死斂棺積
六日出在棺外自言見夫死父曰年二十七不當死六
月長安女子有牛兒兩頭異頸面相鄉四臂共胸俱前
鄉尻上有目長二寸所

景帝二年九月膠東下密人年七十餘生角角有毛

成帝建始三年十月丁未京師相驚言大水至渭水虜
上小女陳持弓年九歲走八橫城門入未央宮尚方掖

問殿門門衛戶者莫見至句盾禁中而覺得

綏和二年八月庚申鄭通里男子王褒衣絳衣小冠帶
劔入北司馬門殿東門上前殿入非常室中解帷組結
佩之招前殿署長業等曰天帝令我居此業等收縛考
問褒故公車大誰卒病狂易不自知入宮狀下獄死

哀帝建平四年正月民驚走持橐或揪一枚傳相付與
曰行詔籌道中相過逢多至千數或被髮徒踐或夜折
關或踰牆入或乘車騎奔馳以置驛傳行經歷郡國二
十六至京師其夏京師郡國民聚會里巷阡陌設祭張

博具歌舞祠西王母又傳書曰母告百姓佩此書者不

死不信我言視門樞下常有白髮至秋止並五行志

鳥獸之妖魚蛙

宣帝黃龍元年未央殿輅輪中雌雞化為雄毛衣變化

而不鳴不將無距雞禍

元帝初元中丞相府史家雌雞伏子漸化為雄冠距鳴

將

永光中有獻雄雞生角者

景帝三年十一月有白頸烏與黑烏羣鬪楚國呂縣白

頸不勝墮泗水中死者數千白黑

昭帝元鳳元年有烏與鵲鬪燕王宮中池上烏墮池死

黑 祥

昭帝時有鵝鵠或曰禿鶯集昌邑王殿下王使人射殺

之青

成帝河平元年二月庚子泰山山桑谷有葢焚其巢巢

難盡墮池中有三葢葢燒死黑

鴻嘉二年三月博士行大射禮有飛雉集于庭歷階登

堂而鳴後雉又集太常宗正丞相御史大夫大司馬車

騎將軍之府又集未央宮承明殿屋上

綏和二年三月天水平襄有燕生爵哺食至大俱飛去
景帝中六年梁孝王田北山有獻牛足上出背上

昭帝元鳳元年燕王宮永巷中豕出園壞都竈銜其脯
六七枚置殿前

昭帝元鳳元年九月燕有黃鼠銜其尾舞王宮端門中
王往視之鼠舞如故王使吏以酒脯祠鼠舞不休一日

一夜死

黃祥

成帝建始四年九月長安城南有鼠銜黃蒿柏葉上民

豕柏及榆樹上爲巢桐柏尤多巢中無子皆有乾鼠矢
數十

昭帝時昌邑王賀聞人聲曰熊視而見大熊左右莫見
高后八年三月祓霸上還過枳道見物如倉狗檝高后

掖忽而不見

犬禍

文帝後五年齊雍城門外有狗生角

景帝三年二月邯鄲狗與彘交

成帝河平元年長安男子石良劉音相與同居有如人
狀在其室中擊之爲狗走出去後有數人被甲持兵弩

至良家長等格擊或死或傷皆狗也自二月至六月乃止鴻嘉中狗與莠交

成帝綏和二年二月大廐馬生角在左耳前圍長各二寸

哀帝建平二年定襄牡馬生駒三足隨羣飲食

惠帝二年正月癸酉旦有兩龍見於蘭陵廷東里溫陵井中至乙亥夜去

武帝元鼎五年蛙與蝦蟇羣鬪

太始四年七月趙有蛇從郭外入與邑中蛇鬪孝文廟

下邑中蛇死

蛇孽

成帝鴻嘉四年秋雨魚于信都長五寸以下

永始元年春北海出大魚長六丈高一丈四枚

哀帝建平三年東萊平度出大魚長八丈高丈一尺七

枚皆死

並五行志

草木之妖

惠帝五年十月桃李華棗實

五行志

文帝六年冬十月桃李華

木紀

昭帝時上林苑中大柳斷仆地一朝起立生枝葉有蟲

食其葉成文字曰公孫病已立又昌邑王國社有枯樹
復生枝葉畦孟以為當有故廢之家公孫氏從民間受
命為天子者

元帝初元四年皇后曾祖父濟南東平陵王伯墓門梓
柱卒生枝葉上出屋

建昭五年兗州刺史浩賞禁民私所自立社山陽蒙茅
鄉社有大槐樹吏伐斷之其夜樹復立其故處並五行志

成帝建始四年秋桃李實

紀本

永始元年二月河南街郵檮樹生支如人頭眉目鬚皆

具亡髮耳

哀帝建平三年十月汝南西平遂陽鄉柱仆地生支如
人形身青黃色面白頭有髭髮稍長大凡長六寸一分
建平三年零陵有樹僵地圍丈六尺長十丈七尺民斷
其本長九尺餘皆枯三日樹卒自立故處

元帝永光二年天雨草而葉相樛結大如彈丸

平帝元始三年正月天雨草狀如永光時

並五行志

雜變異

景帝二年十二月吳二城門自傾大船自覆

宣帝時大司馬霍禹所居第門自壞

成帝元延元年正月長安章城門門牡自亡函谷關次門牡亦自亡

哀帝時大司馬董賢第門自壞

哀帝延平二年四月乙亥朔御史大夫朱博為丞相少府趙元為御史大夫臨延登受策有大聲如鐘鳴殿中

郎吏淫者皆聞焉並五行志

元壽元年九月孝元廟殿門銅龜蛇鋪首鳴本紀

平帝元始元年二月乙未義陵寢神衣在柙中丙申旦

衣在外牀上寢令以急變聞用太牢祠本紀

占驗

漢興承秦滅學之後景武之世董仲舒治公羊春秋始推陰陽為儒者宗宣元之後劉向治穀梁春秋數其旤福傳以洪範與仲舒錯至向子歆治左氏傳其春秋意亦已乖矣言五行傳又頗不同是以摭仲舒別向歆傳載眭孟夏侯勝京房谷永李尋之徒所陳行事訖于王莽舉十二世以傳春秋著于篇文具五行志此不詳載漢興推陰陽言災異者孝武時有董仲舒夏侯始昌昭

宣則眭孟夏侯勝元成則京房翼奉劉向谷永哀平則李尋田終術此其納說時君著明者也察其所言彷彿一端假經設誼依託象類或不免乎億則屢中仲舒下吏夏侯囚執眭孟誅戮李尋流放此學者之大戒京房區區不量淺深危言刺譏構怨彊臣罪辜不旋踵亦不密以失身悲夫

李尋贊

金度玉衡漢五星客流出入八篇

藝文志下同

漢五星彗客行事占驗八卷

漢日旁氣行事占驗三卷

漢流星行事占驗八卷

漢日旁氣行占驗十三卷

漢日食月暈雜變行事占驗十三卷

西漢會要
卷三

三



聖